


■ INSTANZA DA RECURS INDEPENDENTA RADIO/TELEVISIUN

Approvà 2016 quatter recurs cunter emissiuns

(cp) L'onn 2016 ha l'Instanza da recurs independenta da radio e televisiun (UBI) già da liquidar 28 cas. Da quels han quatter violà la concessiun. L'instanza da recurs ha publicità ses rapport d'actività per 2016 ch'ella ha già sutmess dacurt al cussegl federal. L'onn passà èn 19 novs recurs cunter emissiuns da radio e televisiun d'emetturs svizzers vegnids inoltrads. Quai èn set da main che l'onn precedent. Ils posts da mediaziun, subordinads a l'instanza, han registrà en il medem interval en tut 320 reclamaziuns. L'onn avant èsi stà 237. Mo 6% da quels cas èn ids sco recurs tar l'instanza. Ils posts da mediatur, ch'intermedieschan tranter public e realisaders, han ina rolla impurtanta tar l'entira surveglianza davart il cuntegn d'emissiuns da radio e televisiun.

Ils 19 recurs inoltrads èn sa drizzads senza excepziun cunter publicaziuns da la SSR. Da quels recurs èn stadas perturgadas singulas emissiuns da la Televisiun SRF (10), Radio RSF (3), Televisiun RTS (2) sco era mintgamai ina da Radio e Televisiun RTS, Radio RTS e Televisiun SRI. Cun in video sin la pagina da facebook dad SRF-News ha in nov recurs inoltrà pertutgà l'ulteriura puschida publicistica da la SSR. L'instanza è numnadamain era responsabla dapi il 1. da fanadur 2016 per tractar recurs cunter l'ulteriura puschida publicistica da la SSR. Tar quella tutgan spezialmain cuntegns d'online, il tele-text ed ils servetschs per l'exteriur sco Swissinfo.

Tar quatter da las 28 proceduras liquidadas ha l'instanza constatà ina violaziun dal dretg (onn avant: 3). Pervia dad avair violà il cumond d'esser objectiv ha l'instanza sancziunà ina contribuziun da l'emissiun «Il Quotidiano» da la Televisiun RSI pertutgant il Salun d'automobils a Geneva ed in rapport da Radio Top concernent la festa sin via «Veganmania» a Winterthur. En que-



L'instanza da recurs ha publicità ses rapport d'actività per 2016. L'onn passà èn 19 novs recurs cunter emissiuns da radio e televisiun d'emetturs svizzers vegnids inoltrads. MAD

stas contribuziuns èn vegnidas fatgas grevas renfatschas cunter personas senza che quellavessan pudì prender posiziun. Uschia n'èsi betg stà pussaivel da furmar in agen maini davart questas contribuziuns. Era sco na objectiva ha l'instanza giuditgà ina reportascha critica da «Temps Présent» da la Televisiun RTS concernent il commerzi cun vin en connex cun la «Affera Giroud». Questa decisiun da l'instanza è vegnida tratga vinavant al tribunal federal e n'è perquai anc betg en vigur. Sco na cumpatibla cun il cumond da multifariadad ha l'instanza era taxà ina contribuziun dal magazin da consumers «Kassensturz» da la Televisiun SRF concernent esser amicabels vers ils consumers en connex cun las davosas elecziuns federalas. Las pretensiuns spezialas per impurtantas emissiuns electoralas, che garanteschon las medemas schanzas a las partidas che candideschon ed autras gruppas, n'èn betg vegnidas observadas.

L'instanza da recurs UBI è ina cumissiun extraparlamentara da la confederaziun. Ella consista da nov commembers en uffizi accessori sut il presidi da l'advocat grischun e rumantsch *Vincent Augustin*. L'instanza ha da constatar – a basa dals recurs – sche bain cuntegns dad emissiuns realisadas tras radio e televisiun d'emetturs svizzers u da l'ulteriura puschida publicistica da la SSR han violà determinaziuns tras ils cuntegns d'emissiuns redacziunalas (p. ex. cumond d'esser objectiv e da multifariadad, protecziun da minorens ed observar ils dretgs fundamentals). Era ha ella da giuditgar sche l'access ad in program da radio-diffusiun u ad in'otra publicaziun n'è betg vegni refusà cunter tut dretg. Las deliberaziuns da l'instanza èn da princip publicas e las proceduras da recurs gratuitas per tuts participads. Las decisiuns da l'instanza pon vegnir contestadas tar il tribunal federal.